

四庫全書

子部

欽定四庫全書

格致鏡原卷九十

大學士陳元龍撰

水族類一

龍

總論 易震為龍 說文鱗蟲三百六十而龍為之長
能幽能明能細能巨能短能長春分而登天秋分而入
淵 春秋元命苞龍之言萌也陰中之陽故龍舉而雲
興 管子龍生於水被五色而游故神欲小則化如蠶

蠋欲大則藏於天下欲上則凌於雲氣欲下則入於深泉 伊川語錄龍為陰物出則濕氣蒸然成雲 抱朴子山中辰日稱雨師者龍也 管子蛟龍水蟲之神者也乘於水則神立失於水則利廢故曰蛟龍得水而神可立也 埤雅酈元水經云魚龍以秋日為夜按龍秋分而降則蟄寢于淵龍以秋日為夜豈謂是乎龍亦卵生思抱雄鳴上風雌鳴下風而風化 珍珠船四分律文中諸龍初生時睡時嗔時行欲時不能變形餘時皆

能變形 皎然集房琯嘗脩學終南山谷中忽聞聲如
戛銅器之韻問父老云此龍吟也不久雨至矣琯望之
冉冉雲氣游漫果驟雨作自爾再聞徵驗不差後將赤
金鉢戛之謂為龍吟 客退紀談人食砒霜而死龍食
之而肥 五雜俎龍潛水中以虎頭投之則必驚怒簸
騰淘出之乃已 南史或謂江淮多蛟龍能乘風雨決
壞崖岸其性惡鐵因是引東西兩冶鐵器大則釜鬲小
則鍤鉏數十萬斤沈於堰所猶不能合 齊諧記蛟龍

畏棟葉 南部新書龍之性麤猛而畏蠟燭竹及空青
而嗜燒燕食燕肉人不可渡海 蟬史龍性畏五綵縹
其涎能發衆香天火與人火相反得濕而焰遇火而燔
以火逐之則焰滅矣 釋氏書龍有三患一熱風熱砂
燒著皮肉骨髓二惡風暴起吹其宮殿失其寶飾衣服
龍身自現三諸龍娛樂時金翅鳥王入宮搏撮始生龍
子食之又有三苦一雖食百味末後一口化為蝦蟇二
夫婦相交即變為二蛇三背道布鱗砂石身中痛乃連

心說原龍有三停九似之說謂自首至膊膊至腰腰至尾皆相停也角似鹿頭似駝眼似鬼項似蛇腹似蜃鱗似魚爪似鷹掌似虎耳似牛乘異記劉涓子微善畫

龍一日有夫婦造門觀畫因謂曰龍有雌雄其狀不同雄者角浪四峭目深鼻豁鬣尖鱗密上壯下殺朱火熒熒雌者角靡浪平目肆鼻直鬣圓鱗薄尾壯於腹劉不能平問之其人曰身乃龍也請公觀之遂化雙龍而去獻帝春秋龍欲騰翥先階尺木酉陽雜俎龍頭上

有一物博山形名尺木龍無尺木則不能昇天 論衡
短書言龍無尺木無以升天謂龍從木中升天也蓋當
雷電之時龍適與雷電俱在樹木之側雷電去龍從而
上故謂從樹木之中升天也 埤雅龍精于目蓋龍聾
故精于目也 陰陽自然變化論驪龍之眸見百里纖
芥又龍能變水 小史集雅龍不見石 馮贄雲仙錄
天罰乖龍必割其耳 造化權輿龍易骨 埤雅龍八
十一鱗具九九之數九陽也 埤雅龍珠在額 韓子

夫龍之為蟲可狎而騎也然喉下有逆鱗徑尺若嬰之則殺人南史齊始興王鑑獻龍角一枝長九尺三寸色紅有文綦訣取蛻龍牙一枚臨局自然機變橫出杜陽雜編元載龍髯紫拂色如爛椹可長三尺削水精為柄刻紅玉為環鈕或風雨晦冥臨流沾濕則光彩動搖奮然如怒置之於堂中夜則蚊蚋不敢入拂之為聲雞犬牛馬無不驚逸若垂之池潭則鱗介之屬悉俯伏而至引水於空中則成瀑布三五尺未嘗輒斷燒驚

肉爇之則煇煇焉若生雲霧 五雜俎唐開元中有鳳
逐二龍至華陰龍墮地化清泉二道其一為鳳爪傷流
血泉色遂赤今其地有龍骨山云故老謂鳳喜食龍腦
故龍畏之今世所傳烏王啖龍圖蓋本此也夫鳳非竹
實不食而亦嗜龍腦耶 劇談錄李德裕嘗因暇日遊
宴時畏景赫曦咸有鬱蒸之苦既延入小齋列坐開樽
煩暑都盡問之云以金盆貯水漬白龍皮置於坐末龍
皮者新羅僧得自海中 後山談叢夏英公伏日供帳

溫室戒客具夾衣客皆笑之既坐體寒生粟乃以漆斛
漬龍皮也 晉書陸機嘗餉張華鮓魚時賓客滿座華
發器便曰此龍肉也試以苦酒濯之必有異既而五色
光起機還問鮓主果云園中茅積下得一白魚質狀殊
常以作鮓過美故以相獻 述異記漢元和元年大雨
有一青龍墮於宮中帝命烹之賜羣臣龍羹各一杯故
李尤七命曰味兼龍羹 拾遺記方丈之山一名巒雉
東有龍場地方千里玉瑤為井雲色皆紫有龍皮骨如

山阜散百頃其蛻骨之時如生龍 感應經按山阜岡
岫能興雲雨者皆有龍骨或深或淺多在土中齒角尾
足宛然皆具大者數十丈或盈十圍小者纔一二尺或
三四寸體皆具焉嘗因採取見之 述異記晉寧縣有
龍葬洲父老云龍蛻骨於此洲其水今猶多龍骨 國
史補舊說春水時至魚發龍門則有化者至今汾晉山
穴龍蛻骨角甚衆採以為藥有五色者 華陽國志蜀
五城縣值天門龍升天不達遂死此地故掘取龍骨冬

夏無已 本草晉地川谷多有龍死而骨在或云是龍
蛻非死骨 唐年補錄咸通末舒州刺史孔威進龍骨
一具因有表錄其事狀云州之桐城縣善政鄉百姓胡
舉家有青龍鬪死於庭中時四月尚有繭箔在庭忽雲
雷暴起聞雲中擊觸聲血如灑雨灑繭箔上血不汙箔
漸旋結聚可拾置掌上須臾令人冷痛入骨初龍拖尾
及地統一泔桶即騰身入雲及雨悉是泔也龍既死剖
之喉中有大瘡凡長十餘丈身尾相半尾本褊薄鱗鬣

皆魚唯有鬚長二丈其足有赤膜翳之雙角各長二丈其腹相齟齬時遣大雲倉使督而送州以肉重不能全舉乃剗之為數十段載之赴官 春渚紀聞橫海清池

縣尉張澤居於渾州東城夜自庄舍還而月色昏暗殆不分道行遇道旁木枝燈然有光因折以燭路至家插壁間醉不復醒也晨起怪而取視則枝間一龍蛻才大如新蟬之殼頭角爪尾皆具中空而堅扣之有聲如玉石且光瑩奪目遇暗則光燭於室遂寶之於家傳玩好

事沈中老云紹聖間其從兄為青州幕官因脩庭前葡萄架亦得一蛻形體皆如張者獨無光彩耳神龍變化固無巨細但不知有光無光又何謂也 五雜組司徒馬恭敏治河日於淮濟間得一龍蛻長數十尺鱗爪鬐角畢具其骨堅白如玉俗相傳云龍由蛟蜃化者壽不過三歲 朝野僉載蜀縣令劉靜妻患病正諫大夫明崇儼論之曰湏得生龍肝食之必愈靜以為不可得儼乃書符乘風放之上天湏臾有龍下入瓮水中剔取肝

食之而差 賈子說林紫龍涎者舜使虞虎養一紫龍
虎恒持燕炙示龍而不即與食龍俯而垂涎虎以器盛
之滿一合然後與食以為常每日得涎一合繪實者仙
草也堯時生於廟堂之前四時有花取其實磨入紫龍
涎色正赤可以畫金玉其色透入金玉中一寸宮人佩
玉盡畫鸞鳳須得良工一筆有誤終不可改 拾遺記
方丈山龍闕之處膏血如水流膏色黑者著草木及諸
物如淳漆也膏色紫者著地凝堅可為寶器燕昭王二

年海人乘霞舟以雕壺盛數斗膏以獻昭王王坐通霞
臺以龍膏為燈光耀百里烟色丹紫國人望之咸言瑞
光世人遙拜之燈以火浣布為纏物類相感志漢武
帝獲梁上翁獻紫螺皮肉中有物如牛脂東方朔曰此
蛟龍髓傳面令人好顏色又女子在孕用之易生會後
宮難產者試之殊有神效帝以脂塗面使悅澤北夢
瑣言龍生三卵一為吉弔也其吉弔上岸與鹿交或於
水邊遺精流槎遇之黏裹木枝如葡萄焉色微青黃復

似灰色號紫梢花益陽道 括地圖龍池之山四方高
中央有池方七百里羣龍居之多五花樹羣龍食之去
會稽四千里 支僧載外國事迦維羅越國今屬播黎
越國猶有優婆塞姓釋可二十餘家是白靜王之苗裔
昔太子生時有二龍王一吐冷水一吐暖水今有池尚
一冷一暖 西京雜記瓠子河決有蛟龍從九子自決
中逆上入河噴沫流波數十里 外國事毗呵羅寺有
神龍住米倉中奴取米龍輒却後奴若長取米龍不與

倉中米若盡奴向龍拜倉即盈溢 晉書魏明帝青龍

元年正月甲申青龍見郊之摩陂井中凡瑞興非時則

為妖孽况困於井非嘉祥矣 南史梁元帝承聖二年

江陵城濠中有龍騰出煥爛五色竦躍入雲六七小龍

相隨飛去羣魚騰躍墜死於陸道龍處為窟若數百斛

圖 龍城錄開元間景州水中見一龍三頭 錄異記

蜀唐千歲金州刺史王宗郎奏洵陽縣洵水畔有青烟

廟數日廟上烟雲昏晦日夜奏樂忽一旦水波騰躍有

羣龍出於水上行入漢江大者數丈小者丈餘如五方之色有如牛馬驢羊之形大小五十累累接迹行入漢江却過廟所復往數里或隱或見三日乃止 北夢瑣

言大江之南蘆荻之間往往燒起睡龍唐天復中澧州

葉源村民鄧氏子燒畬柴草積於天井

山中穴也

火勢既盛

龍突出騰在半空縈帶為火所燎風力益壯狂焰彌熾擺之不落竟以仆地而斃長亘數百步村民徙居而避之朱梁末辰州民向氏因燒起一龍四面風雷急雨不

能撲滅尋為煨燼而角不化瑩白如玉 李詩註唐玄

宗嘗龍潛於興聖宮及即位興慶池嘗有一小龍出遊
宮外御溝水中其狀蜿蜒後一夕其龍自池中御素雲
望西南去及上至嘉陵江乘舟將渡見一小龍翼舟而
進上謂左右曰此吾興慶池中龍也命以酒沃酌上親
自祝之龍乃自水中振鬣而去 戎幕閒談茅山龍池
中其龍如蜥蜴而五色自昔嚴奉貞觀中勅取龍子以
觀御製歌送歸黃冠之徒競托其神李德裕恐其惑世

嘗捕而脯之龍亦竟不能神也 文獻通考宋真宗遣
內侍任文慶於茅山設醮禱郭真人池取二龍長二寸
許手中仰覆無懼中路風雨夫一奉一歸以示近臣復
令文慶送還池中俄見二龍一乃送還者一乃所失者
伊川語錄龍只是獸茆山華陽洞常有之亦於乾地
能行形狀殊可愛然不齧人五臺山者則傷人矣 遊
名山記茆山有龍池池不甚廣小黑龍十數遊其中取
視之長僅三寸昂首四足目精爛然腹有丹書而無北

牡蓋蜥蜴類也每歲旱禱雨輒應今與山之神同著祀
典 酉陽雜俎玄宗嘗詔術士羅公遠與不空同祈雨
校功力俱詔問之不空曰臣昨焚白檀香龍上命左右
掬庭水嗅之果有檀香氣 左傳帝舜世有畜龍氏及
有夏孔甲帝賜之乘龍河漢各二各有雌雄劉累學擾
龍於豢龍氏以事孔甲能飲食之夏后嘉之賜氏曰御
龍以更豕韋之後龍一雌死醢以食夏后 中朝故事
長安有豢龍戶觀水即知龍色目有無悉知之懿皇朝

龍戶上言龍池中走失兩條往關東尋訪數十日東都
魏王池中見之取而歸關經華州時李訥為華州刺史
為人正直聞得龍來大以為虛妄命就公府視之則於
一小餅子中倒於盆內乃二細鰕魚也訥怒目曰何以
為驗其人請鑿穴尺許注水其間收鰕投水內魚倒水
中相趁旋轉尾觸穴四隅隨觸而陷水亦暴漲遂巡穴
已闊數尺其人語訥云恐穴更廣即難制遂搦入餅中
訥方奇之厚贈錢帛攜歸輦下抱朴子西域方士能

神祝者臨淵禹步吹氣龍即出浮其初出乃長十數丈
於是士更吹之一吹則龍輒一縮至長數寸方士掇取
著壺中或有四五龍以少水養之物塞壺口於是方士
聞有旱處便賣龍往賣之一龍值數千斤金舉國會斂
以顧之直畢乃發壺出一龍著淵潭之中因復禹步吹
之輒一吹一出長數十丈須臾雲雨四集 五行記周
靖帝大衆元年夏滎陽汴水北有龍鬬初見白光直屬
天自東方而來有白龍長十許丈西北向舐掌而鳴西

北有黑龍亦乘雲而至風雷相擊乍合乍離暴雨大注
自午至申白龍升天黑龍墜地五雜組俗有立夏分
龍之說蓋龍於是時始分界而行雨各有區域不能相
踰故有咫尺之間而晴雨頓殊者龍為之也酉陽雜
俎龍在閭浮提者五十七億龍於瞿陀尼不降濁水
阿含經難陀跋難陀二龍其形最大統湏彌山七匝頭
猶山頂尾在海中後魏書波知國有三池傳云大池
有龍王次者龍婦小者龍子行人設祭乃得過不祭多

遇風雪

列仙傳馬師皇者黃帝馬醫有病龍下垂耳

張口師皇針其脣飲以甘草湯而愈後一旦負之而去

山川紀異湯陰西有真人社舊傳孫登寓此值旱衆

禱於龍得雨將祭謝之登曰此病龍雨安能蘇禾稼弗

信請嗅之水果腥穢龍時背生疽聞登言化老翁求治

曰病痊當有報不數日果大雨石上忽裂一井其水湛

然蓋龍穿此以報也書焦福龍優樂過逾於人薄福

諸龍日苦熱沙搏身為諸小蟲之所啖食北夢瑣言

世有乖龍苦於行雨而多竄匿為雷神捕之或在古木及楹柱之內若曠野之間無處逃匿即入牛角或牧童之身往往為此物所累而震死也 孔六帖夷陵江或浮大木蔽塞水面土人謂之龍巢翻

詳類 內典龍有胎卵濕化四種 抱朴子有自然之龍有蛇蠍化成之龍 潛確類書別行云有四種龍一天龍守天宮殿持令不落者二神龍興雲致雨益人間者三地龍決江開瀆者四伏藏龍守輪王大福人藏者

須彌藏經龍有五種象龍馬龍魚龍蝦蟇龍此四種

旁類蛇龍五龍之長是正類淮南子羽嘉生飛龍毛

犢生應龍介鱗生蛟龍介潭生先龍廣雅有鱗曰蛟

龍有翼曰應龍有角曰龍巨彪切龍無角曰蛟龍一云有

角蚪龍無角螭龍龍未昇天曰螭龍周祈名義考廣

雅云云其言若辨而實非也按說文龍从肉童省聲

象肉飛之形何有於翼也龍時飛則飛時潛則潛螭非

定稱也說文蛟龍屬無角曰蛟蚪龍子無角者螭若龍

無角而黃北方謂之土螻蛟則謂之蛟蚪則謂之蚪螭
則謂之螭不可言蛟龍蚪龍螭龍也亦猶謂螭為螭蛇
也埤雅螭龍類將亦可謂螭龍哉 南越志螭龍身長
四丈青黑色赤帶如錦文隨渭水而下入於海有毒傷
人即死 河圖黃金千歲生玄龍 易乾鑿度帝王始興河
洛龍見皆察其首黑者人正白者地正赤者天正 王
暉龍經黑龍曰水精赤龍亦曰水精黃龍曰龍長蛇龍

亦曰龍長 瑞應圖黃龍者四龍之長四方之正色神
靈之精也王者不漉池而漁則應和氣而遊於池沼
龍魚河圖黃龍從洛水出詣虞舜鱗甲成字令左右寫
文竟龍去 淮南子禹濟於江黃龍負舟 古今注高
祖五年黃龍見華陽池十餘日九年又見長安五鳳四
年黃龍出廣漢甘露元年黃龍見新豐二年龍見上郡
騰躍五色昇天丞相以下上壽章帝建初三年黃龍見
汝南項氏田廬中長五丈餘高二丈光耀廬舍及樹皆

黃 魏略文帝欲受禪郡國奏黃龍十三見明帝鑄銅
黃龍高四尺置殿前 繆襲賦序青龍者大辰之精木
官之瑞 封禪書夏得木德青龍止於郊 尚書中候
周公旦即攝七年青龍銜甲 舊唐書貞觀中汾州言
青龍白龍見白龍吐物在空中有光如火至地陷入二
尺掘之則玄金也形圓斜廣尺餘高六七寸 春秋合
誠圖堯母慶都出觀三河奄然陰風赤龍與慶都合而
生堯 元命苞堯遊河渚赤龍負圖以出圖亦如綈

淮南子云媧氏殺黑龍以濟冀州注黑龍水精也殺之
以止雨 三秦記昔有黑龍從南山出飲渭水其行道
為龍首山 晉載記呂光伐龜茲軍其城南營外夜有
一黑物大如斷堤搖動有頭角目光若電及明而雲霧
四周遂不復見旦視其處南北五里東西三十餘步鱗
甲隱地之所昭然猶在光笑曰黑龍也俄而雲起西北
暴雨滅其迹 宋書徐羨之嘗經山中見黑龍長丈餘
頭有角前兩足皆具無後足曳尾而行 漢武內傳王

母駕九色斑龍

法苑珠林法顯至迦施國國有白耳

龍每與衆僧約令國內豐熟皆有信効 廣博物志蜺

龍龍屬也明月之珠藏於蚌中蜺龍伏之 拾遺記南

潯之國有洞穴陰源其下通地脉中有毛龍毛魚時脫骨于

曠澤之中魚龍同穴而處其國獻毛龍一雌一雄放置

豢龍之宮至夏代養龍不絕因以命族至禹導川乘此

龍及四海攸同乃放河內 南史王僧辯傳初承聖二

年三月有兩龍自城西江中騰躍升天五色分明遙映

江水百姓咸仰面目之父老竊相謂曰地龍已去矣

稽神錄楚王馬希範修長沙城開壕畢忽有一物長十丈餘無頭尾手足狀若土山自北岸出游泳水上久之入南岸而沒出入俱無蹤跡或謂之土龍 渚宮舊事

江陵趙姥以沽酒為業義熙中居室內忽地隆起姥察為異朝夕以酒酹之嘗見一物出頭似驢而地初無孔穴及姥死家人聞上下有聲如哭後人掘地見一異物蠢然不測大小須臾失之俗謂之土龍 拾遺記西域

獻火龍高七尺映日看之光如聚炬火 春渚紀聞蕭
注從狄殿前之破蠻洞也收其實貨珍異得一龍長尺
餘云是鹽龍蠻人所養也藉以銀盤中置玉盃以玉筋
挑海鹽飲之每鱗甲中出鹽如雪則收取用酒送一錢
匕專主興陽而前此無說者何也後因蔡元度就其體
舐鹽而龍死其家以鹽封其遺體三數日用亦大力
後聞此龍歸蔡元長家云 北夢瑣言洛中有洞穴曾
有誤墮其中行數里漸明見有宮殿人物凡九處又有

大羊羊髯有珠人取食之後出以問張華華曰此地九
仙館也大羊名曰癡龍 懷麓堂集龍生九子不成各

有所好囚牛龍種平生好音樂今胡琴頭上刻獸是其
遺像睚眦平生好殺今刀柄上龍吞口是其遺像嘲風
平生好險今殿角走獸是其遺像蒲牢平生好鳴今鐘
上獸紐是其遺像狻猊平生好坐今佛座獅子是其遺
像霸下平生好負重今碑座獸足是其遺像狴犴平生
好訟今獄門上獅子頭是其遺像負鼎平生好文今碑

兩旁文是其遺像蚩吻平生好吞今殿脊獸頭是其遺像
菽園雜記鼉屬形似龜性好負重故用戴碑螭吻
形似獸性好望故立屋角上蒲牢形似龍而小性好吼
有神力故懸於鐘上憲章形似獸有威性好囚故立於
獄門上饕餮性好水故立於橋所螭蜴形似獸鬼頭性
好腥故用於刀柄上蠙蚶形似龍性好風雨故用於殿
脊上螭虎形似龍性好文彩故立於碑首金猊形似獅
性好火烟故立於爐蓋上椒圖形似螺螄好閉口故立

於門上今呼鼓了非也虬螭形似龍而小好立險故立
於護朽上鰲魚形似龍好吞火故立於屋脊上獸吻形
似獅好食陰邪故立於門鐶上金吾形似美人首魚尾
有兩翼性通靈不睡故用巡警

按龍生九子諸書所載大同小異楊慎外集云

狴犴立獄門與前李說同與此云憲章異又饕餮好飲食故立於鼎蓋虬螭性好水故立於橋上與此全異陳慤仁庶物異名疏又云虬螭好負重今碑下獸是即李說之霸下音同字異耳與楊說異矣又云蜥蜴好水今橋上獸亦與諸說不同

化龍 華陽國志永昌郡古哀牢國其先有一婦人名

曰沙壺

後漢作沙壺

依哀牢山下居捕魚自給忽於水中觸

一沈木遂感而有娠度十月產子男十人後沈木化為

龍出謂沙壺曰君為我生子今在乎九子驚走惟一小

子不能去陪龍坐龍就而舐之南史梁武帝踐祚郗

后酷妬忌及終化為龍入於後宮通夢於帝或見形光

彩照灼帝體將不安龍輒激水騰涌霏雪錄山東民

間婦人一臂有物隱然膚中屈佶如蛟龍狀婦喜以臂

浸盆水中一日雷電交作婦自牖出臂果一龍擘雲而

去異苑陶侃嘗漁雷澤得一織梭還掛於壁有頃雷
雨梭變成赤龍從屋騰躍而去神仙傳壺公遣費長
房歸以一竹杖與之曰騎此當還家以投葛陂中長房
騎杖忽然如眠便到家以杖投葛陂顧之乃青龍也

集異記元和中都尉韋宥舟行見新絲箏絃周纏蘆心
宥即拔蘆伸絃其長倍尋則試縱之應手復結宥以付
箏妓將安之惟短二三寸耳食頃則已蜿蜒舒展選蠕
搖動雙眸瞭然矣駭而投於江風浪交作俄有白龍長

百丈擎攬昇天 酉陽雜俎有史生遊華山時暑環憇
一小溪忽有一葉大如掌紅殷可愛隨流而下史獨接
得置懷中坐食頃覺懷中冷重潛起觀之其葉上鱗起
粟粟而動始驚懼弃林中遽白衆人曰此必龍也可速
去湏臾林中白烟生彌布一谷史下山未半風雷大至
僞史南唐時有蒼頭持龍水圖求貨或得之將練以
為服忽釜中雲起蒸見二龍騰躍穿壁而去 明皇雜
錄開元中大早上於新池創一殿名馮紹正四壁各畫

一龍西壁一素龍蜿蜒若奮風雲隨筆而生壁上鱗甲
皆熱有白氣自簷廡出池中波濤洶湧俄有白龍乘雲
而起風雨大作 國語褒國之神化為二龍夏后藏釐

呂氏春秋白龍化為魚豫且射中左目 宋書晉愍

帝建興二年十一月抱罕羌妓產一龍子色似錦文嘗
就母乳遙見神光少得就視 趙耕龍公碑張路斯頴
上人隋初明經登第景龍中為宣城令夫人關州石氏
生九子自宣城罷歸常釣於焦氏臺之陰一日顧見釣

處有宮室樓殿遂入居之自是夜出旦歸歸輒體寒而濕夫人驚問之公曰我龍也蓼人鄭祥遠者亦龍也騎白牛據吾池自謂鄭公池吾屢與戰未勝明日取決可使九子助我領有絳綃者我也青綃者鄭也明日九子以弓矢射青綃者中之怒而去公亦逐之所過為谿谷達於淮而青綃者投於合肥之西山以死為龍穴山九子皆化為龍公之兄為馬步使者子孫散居潁山其基皆存焉 柳子厚謫龍說扶風馬孺子在澤州與羣兒

戲郊亭上有奇女墮地有光熒然被緞裹白文之裏首
步搖之冠遂入居佛寺講室七日取杯水飲之噓成雲
氣五色脩脩如也因取裹反之化為白龍徊翔登天

龍城錄茅山有道士吳綽采藥於華陽洞口見一兒手
把三珠戲松下綽從之兒奔入洞化為龍以珠瑱左耳
綽劖其耳失珠列仙傳呼子先者漢中卜師也壽百
餘年臨去呼酒家老嫗曰急裝當與汝俱夜有仙人持
二茅狗來呼子先子先持一與嫗乃龍也騎之上華陰

山後嘗於山上大呼言子先酒母在此耳 三秦記河
津一名龍門巨靈跡猶存水懸下注旁有山水陸不通
龜魚之屬莫能上江海大魚集門下數千不得上上者
為龍不上者魚故云曝腮龍門 林登博物志鯉魚登
龍門即有風雨隨之天火自後燒其尾乃化為龍矣

蛟 附虬 螭

埤雅蛟龍屬也其狀似蛇而四足 山海經畢山帝苑
之水出焉其中多蛟注蛟似龍蛇而小頭細頸頸有白

嬰大者十數圍卵生子如三斛瓮能吞人 說文龍無

角曰蛟池魚滿三十六百蛟來為之長能率魚而飛置

筍水中即蛟去 述異記虺五百年化為蛟蛟千年化

為龍 埤雅蛟能交首尾束物故謂之蛟也俗呼馬絆

蛟尾有肉環束物則以首貫之舊云鳳骨黑蛟骨青

說文眉交故謂之蛟 陸禋續水經注蛇雉遺卵入地

千年為蛟 酉陽雜俎虎魚老則為蛟 玉堂清話蛇

雉遺卵為蛟其蛇出殼之日害於一方洪水飄蕩吳人

謂之發洪 拾遺記帝以季秋之月泛衡蘭雲鷁之舟
釣於桂臺下以香金為鈎縹緲為綸丹鯉為餌釣得白
蛟長三丈若大蛇無鱗甲帝曰非祥也命大官為鮓肉
紫骨青味甚香美 一統志大江中有蜺磯南有一石
穴廣一大深叵測蓋蜺居也蜺即老蛟也此磯在今蕪
湖江口有廟俗訛為蜺姬廟 山海經禱過之山浪水
出焉而南流注於海其中有虎蛟其狀魚身而蛇尾其
音如鴛鴦食者不腫可以已痔 潛確類書元嚴子忠

汀州人遣僕入山掘筍雷電大作樹下一窟有物如犬
而長其聲如雷僕揮鋤擊之而斃人謂之山蛟再積五
百年則為龍矣 續搜神記長沙江邊有女下渚澣衣
覺身中有異遂妊身生三物皆如鰕魚女以已所生甚
憐之著澡盤水中養經三月遂大乃是蛟子各有字大
者為當洪次者名破阻小者曰撲岸天暴雨三蛟一時
俱去 朝野僉載洛水中有人見豎子洗馬頃之見一
物如白練帶極光晶繳豎子之項三兩匝即落水死凡

是水中及灣泊之間皆有之人澡浴洗馬死者皆謂龜所引非也此名白特宜慎防之蛟之類也 三吳記吳時有王述者採藥於天台山忽見溪中有一小青衣長尺餘徑入雲中良久海上雲起頃刻雷電交鳴見牽一物如布而色如漆乃黑蛟耳 山堂肆考黃牛洲在南昌府城西南相傳許遜逐蛟精蛟化為黃牛於此因名北夢瑣言岑參賦云瞿唐之東下有千歲老蛟化為婦人彩服靚粧遊於水濱

虬 說文虬龍子有角者 搜神記武昌虬山有龍穴
居人每見神虬飛翔出入歲旱禱之即雨後人築塘其
下曰虬塘 淮南子黑蜨神虯潛泉而居將雨則躍
元氏掖庭記大德間尾灑夷於清源洞得一物如龍皮
薄可相照鱗鱗攢簇玉色可愛又間成花卉之形或紅
或綠暑月對之涼風自生遣人進貢時無識者有一胡
僧曰此斑花玉虬殼也

螭 南詔錄螭魚四足長尾鱗成五色頭似龍無角

說文螭若龍無角而黃北方謂之土螭 拾遺記崑崙
山第三層有螭潭百里多龍螭皆白色千歲一蛻其五
臟 洞冥記元封中帝好微行於長安城西夜見一螭
遊於路董謁曰昔桀媚末喜於膝上以金簪貫玉螭腹
為戲今螭腹餘金簪穿痕得非此耶 呂氏春秋螭食
乎清而遊乎濁

格致鏡原卷九十

欽定四庫全書

子部

格致鏡原卷九十一

詳校官中書臣羅錦森

侍讀臣孫球覆勘

總校官中書臣朱鈐

校對官原任典簿臣郭祚熾

謄錄舉人臣查浩

欽定四庫全書

格致鏡原卷九十一

大學士陳元龍撰

水族類二

魚總

淮南子介鱗生蛟龍蛟龍生鯢鯢鯢生建邪建邪生
庶魚凡鱗者生於庶魚 天文錄魚星主理陰陽而知
雲雨之期也故讚曰漢中魚星知雲雨也占曰魚星明
大河海水皆出又云魚星明大則陰陽和氣魚星忽不

明而在則魚多魚星亡則魚少 晉書天潢南三星曰
咸池魚罔也 永嘉記青田谿冬天水熱如湯衆魚歸
之名曰魚倉 禮記立春後十日魚上冰 曹植說賦
水之魚不遊於江淡水之魚不入於海 田家雜占魚
躍離水面謂之秤水主水漲高多少增水多少 本草
綱目鱗者鱗也魚產於水故鱗似鱗行則上水恐亂鱗
也 五雜組凡魚之游皆逆水而上雖至細之鱗遇大
水亦捨而上蓋逆則其鱗順順而反逆矣 小史集雅

流水之魚背鱗白而味美止水之魚背鱗黑而味惡

說林魚懷珠而鱗紫 天玄主物薄魚之懷珠至五十

年則無復鼓鰓腦上有汗其鬣鱗口眼皆異鬣當紫色

眼當紅色口當赤色 頤生論魚無氣 物類相感志

魚始雷向下未驚蟄頭皆向上 小史集雅魚目不瞑

陰陽自然變化論魚不見水 小史集雅濕生者眼

無胞 淮南子月者陰之宗是以月虧則魚腦減月盈

則魚腦盈 古文奇字魯从魚从自凡物之息以鼻魚

鼻孔最小氣不能遽通以腮為呼吸 正字通宋淳化
三年京師里巷婦女裝鏤魚腮中骨號魚媚子以飾面
或曰魚水族陰類面為六陽之首陰侵陽將有災明年
秋冬積雨衢路水深數尺民被其害 爾雅魚枕謂之
丁魚腸謂之乙魚尾謂之丙注枕在魚頭骨中形似篆
書丁字可作印乙丙皆似篆書字因以名焉 席上腐
談禮記魚去乙鄭氏注云魚體中害人者東海鰩魚有
骨名乙在目傍狀如蒙篆乙字食之鯁人不可出 周

書西海魚骨魚幹魚脇北海魚鈎

魚兵如鈎也

魚石

頭中大石也

大

都鯢魚刀咸會於中國

錦繡萬花谷腹腴魚腹下

肥肉也禮記少儀云冬右腴夏右鰭注云冬氣在上腴

腹下也夏氣在下鰭脊也

名物通玉腴魚腴也福州

人謂之佩羹

本草綱目鰭鰾魚鰾也即魚白膠

南

史宋明帝以蜜漬鰭鰾一食數升

齊民要術造鰭鰾

法取石首魴魚鰾魚三種腸合之

食色紳言魚卵不

經鹽漬三年尚可再活

魯語魚禁鯢鰾韋昭注魚未

成子在胎也 爾雅疏凡魚之子總名鰕 說文鰕魚
子也鰕魚子生者也鰕是子之在胎者鰕是子之散泊
在草者 演繁露凡魚產子必竝木根草幹戛刮其腹
子乃得出出則黏根著莖之上離離如珠然後泥不能
淹浪不能漂其子乃得成魚也 彙苑詳註凡魚鰕子
必浴水痕雖乾涸十年遇水即生其長甚易其鰕子也
以五月鯉魚以五月下惟銀魚鰕殘魚鰕子於冰冰解
三日乃生也 唐書太宗觀魚於西宮見魚躍焉問其

故漁者曰此當乳也於是中網而止 本草李時珍曰

凡魚皆冬孕子春末夏初則於湍水草際生子有牡魚
隨之灑白覆子數日即化出謂之魚苗 北戶錄南海

諸郡人至八九月於池塘間采魚子著草上懸於竈烟
上至二月春雷發時却收草浸於池塘間旬日間如蝦
蟬子狀鬻於市號魚種育池塘間一年內可供口腹也
通雅陸文裕深云今人家池中所蓄其種皆出九江
謂之魚秧每歲三月初旬挹取於水細如髮以水養之

舟中漸次成長九江設厰以課之洪武十四年欽差總
旗王道兒等至府編僉漁人謂之潞戶南海諸郡收魚
子出如科斗謂之鯀鯀黃省曾養魚經仲春取子於
江曰魚苗畜於小池稍長入葦塘曰葦鰮可尺許徙之
廣池飼以草九月乃取有難長之秧曰媰艘其首黃色
曰螺師青以其食螺師也故名其口尖替年而鼻竅始
通不得通則死長至尺許乃易大 談苑小池中魚至
九月十月間宜取投大水中不爾冬間俱凍死 養魚

經魚之行遊晝夜不息有洲島環轉則易長 養魚經
魚食楊花則病 留青日札魚食巴豆而浮 說文池
魚滿三千六百蛟來為之長能率魚飛置笥水中即蛟
去 談苑眉州有人家畜數百魚深池中以塼甃四圍
皆屋凡三十餘年一日天晴無雷池中忽發大聲如風
雨皆躍起羊角而上不知所往舊說不以龜守則為蛟
龍所取余以謂蛟龍必因風雨疑此魚圈局三十餘年
日有騰拔之志精神不衰久而自達 物類相感志守

魚取道中棄胞盆覆之埋池四角魚則永在池不敢出也 南史宋盧道隱居廬陵屋前有池養魚皆名呼之次第來取食 王制獺祭魚然後漁人入澤梁 曲禮水潦降不獻魚鱉注水涸易得不足貴也 周禮獻人掌以時漁為梁注梁水以取漁 後山談叢魚行隨陽春夏浮而溯流秋冬沒而順流漁者隨其出沒上下而取之 酉陽雜俎興州有一處名雷穴水常半穴每雷聲水塞穴流魚隨流而出百姓每候雷聲繞樹布網獲

魚無限非雷聲漁子聚鼓擊於穴口魚亦輒出所獲半
於雷時 朝野僉載峰州有一道水從吐蕃中來夏冷
如冰雪有魚長一二寸來去有時竝水上如粥人取烹
之而食千萬家取不可盡不知所從來 曲洧舊聞漆
洧其水清有魚數種土人不善施網罟冬積柴水中為
湫音以取之以搗澤蓼雜煮大麥撒深潭中魚食之輒
死浮水上可俯掇久之復活謂之醉魚云 溪蠻叢笑
山獠無漁具上下斷其水搯蓼葉困魚魚以辣出名瘠

魚 珍珠船漁人以猢猻毛置網四角則多得魚云魚
見之如人見錦繡也 管子涸川之精生螭一頭兩身
其形若蛇其長八尺以其名呼之可以取魚鰲 酉陽
雜俎魚有睫及目合腹中有連珠二目不同連鱗白鬚
腹下丹字竝殺人 曲禮豪魚曰商祭鮮魚曰脰祭注
豪乾商度也度燥濕之宜脰直也魚鮮者不餒挺然直
也 山堂肆考晉人以魚為鮭菜梁受家貧愧無鮭菜
以待君子 庶物異名疏銀刀魚也杜詩出網銀刀亂

世說蠻名魚為奴隅 清異錄楊虞卿家號魚為水
花羊避諱故也 東坡志林僧家謂魚為水梭花 譚
峭化書庾氏穴池構竹為凭檻登之者其聲策策焉辛
氏穴池構木為凭檻登之者其聲堂堂焉二氏俱牧魚
於池中每凭檻投餌魚必踴躍而出他日但聞策策堂
堂之聲不投餌亦踴躍而出則是庾氏之魚可名策策
辛氏之魚可名堂堂食之化也 陳善捫蝨新話人有
於庭檻間鑿池以牧魚者每鼓琴於池上即投以餅餌

其後魚但聞琴聲丁丁然雖不投餅餌亦莫不跳躍而
出客不知其意在餅餌也以為瓠巴復生昔庚氏之魚
可名策策辛氏之魚可名堂堂則此庭下之魚可名丁
丁矣 雲龍州志普河魚池在趙州東北五里池中多
魚人不敢捕云龍王兵也 瓊州志魚爺井在瓊州府
文昌縣西相傳泉與海通中有大魚頭白俗呼為魚爺
有人呼之即出 楊慎外集風道北來天乃大水泉蛇
乃化為魚是謂魚婦死即復蘇 古今注江東謂青衣

魚為婢鰮魚為童子 文選魚婢小魚也亦曰妾魚

酉陽雜俎蜥蜴以魚為偶 莊子朽瓜化為魚物之變

也 三秦記江海集龍門下登者化龍不登者點額暴

腮 記異錄地誌慈州文城縣搔口本夏禹鑿山通河

年年魚化之地也每春大魚竝河西上唐人嘗勅禁采

捕至仲春後有點額不化者傍岸求死終不過富平津

浮梁孟州歲以致貢 酉陽雜俎江中小魚化為蝗而

食五穀者百歲為鼠 報應錄唐豫章民有熊慎者其

父以販魚為業嘗載魚宿於江汭聞千百念佛經聲驚而察之乃船中諸魚也遂歎異而悉取放之不復以漁為業 五雜組唐天寶間當塗民劉成李暉以巨舫載魚有大魚呼阿彌陀佛俄而萬魚俱呼其聲動地 晉書魏嘉平四年五月有二魚集於武庫屋上此魚孽也 王肅曰魚生於水而升於屋介鱗之物失其所也邊將其殆有棄甲之變乎 白六帖光啟二年揚州雨魚 權衡庚申外史元順帝時天雨魚長尺許城中人家皆

取而食之 朝野僉載杭州富陽縣韓珣莊掘井纔深五六尺土中得魚數十頭土有微潤 歙州圖經歙州赤嶺下有小溪俗傳昔有人造橫溪魚梁魚不得下半夜飛從此嶺過其人遂於嶺上張網以捕之魚有越網而過者有飛不過而變為石者 西京雜記昆明池刻玉石為魚每至雷雨魚常鳴吼鬣尾皆動漢世祭之以祈雨往往有驗 廣輿志重慶府涪州江心有雙魚刻石上每一魚三十六鱗見則歲豐

金魚

山堂肆考金魚體如金一名火魚有通身赤者有半身赤者有亂赤紋者有背赤文作卦形者有頭赤尾白者有鱗赤身白者色象各各不同碧鷄山下洞內有金線魚中都有玳瑁魚雪質而黑章的礫若漆儼然玳瑁文采尤可觀也 七脩類稿杭自嘉靖戊申來生有一種金鯽名曰火魚以色至赤故也人無有不好家無有不畜競色射利交相爭尚多者十餘甌金魚不載於諸書

鼠璞以為惟六和塔寺池有之故蘇子美六和塔詩云
沿橋待金鯽竟日獨遲留東坡亦曰我識南屏金鯽魚
南渡後則衆盛也據此始於宋生於杭今南北二京內
臣有畜者又異於杭其紅真如血色然味比之鮓鯽遠
不及杭又有金鯽亦佳二魚雖有種生或曰食市中污
渠小紅蟲則鮓之黑者變為金色矣羣芳譜金魚有
鯽鯽鯽數種鯽鯽尤難得獨金鯽耐久肉味短而韌
甘鹹平無毒自宋以來始有蓄者今在在養玩矣初出

黑色久乃變紅又或變白名銀魚有紅白黑班相間者有金管者三尾者五尾者甚且有七尾者時頗尚之

養魚經嘗怪金魚之色相變幻遍考魚部即山海經異物志亦不載讀子虛賦有曰網玳瑁紫貝及魚藻同置五色丈魚固知其色相自來本異而金魚特總名也惟人好尚與時變遷初尚純紅純白繼尚金盃金鞍錦被及印紅頭裏頭紅連鰓紅首尾紅鶴頂紅若八卦若骰色繼尚黑眼雪眼珠眼紫眼瑪瑙眼琥珀眼四紅至十

二紅二六紅甚有所謂十二白及堆金砌玉落花流水
隔斷紅塵蓮臺八瓣種種不一總之隨意命名從無定
顏者也至花魚俗子目為癩不知神品都出自花魚將
來變幻可勝紀哉而紅頭種類竟屬庸板矣第眼雖貴
於紅凸然必泥此無全魚矣乃紅忌黃白忌蠟又不可
不鑑如藍魚水晶魚自是陂塘中物知魚者所不道也
若三尾四尾品尾原係一種體材近滯而色都鮮艷可
當具品第金管銀管廣陵新都姑蘇競珍之 珍珠船

南城金魚日食蒸餅白麪二十斤 宋史錢塘江有五
色魚鯽首鯉身 正字通金魚吉安有一身具五色者
名手中魚建陽銅山古井五色魚長四寸似龍尾豎四
爪旱取以祈雨置于湖自歸井中

嘉魚

埤雅嘉魚鯉質鱗鱗肌肉甚美食乳泉出於丙穴 任
豫益州記嘉魚細鱗似鱖魚蜀山謂之拙魚 水經注
東南得丙水口水上承丙穴穴出嘉魚常以三月出十

月入穴穴口廣五六尺去平地七八尺泉懸注魚自穴
下透入水穴口向丙故曰丙穴下注褒水 酉陽雜俎
丙穴魚食乳水食之甚溫 山堂肆考按一統志丙穴
在夔州府達縣東北通明發縣井峽中凡十穴皆出嘉
魚春社前魚出穴秋社即歸其出也止於巴渠龍脊灘
首有黑點謂照星象相感而成長身細鱗肉白如玉味
鹹而美益食鹽泉也 彙苑詳註嘉魚如小鱖魚多脂
煎不假油 雲南記雅州諸水多有嘉魚或云黃河中

味魚亦此類也

鯉

埤雅鯉今之賴鯉也一名鱣鯉脊中鱗一道每鱗上有
小黑點文大小皆三十六鱗魚之貴者 養生雜纂鯉
至陰之物也 本草鯉魚最為魚之主形既可愛又能
神變乃至飛越山河所以琴高乘之山上 埤雅鯉魚
今人以盤水養之雖困鱗不反白蓋健魚也 養魚經
水畜者魚也以六畝地為池池中有九洲求懷子鯉魚

長三尺者二十頭壯鯉魚長三尺四頭以二月上庚日
內池中令水無聲魚必生至來年二月得魚七萬枚每
頭生三千五百枚所以養鯉者鯉不相食易長又貴也
凡魚遠行則肥池中聚石作九島魚繞之日行千里
水經鱣鯉出鰲穴三月則上度龍門得度為龍矣否則
點額而還 三秦記龍門之下每歲季春有黃鯉魚自
海及諸川爭來赴之一歲中登龍門者不過十一初登
龍門即有雲雨隨之天火自後燒其尾乃化為龍矣

龍門

山在河東界

淮南子詹公能釣千歲之鯉 河圖黃帝遊

於洛見鯉魚長三丈青身無鱗赤文成字 大魏諸州

記小平津有洞穴鯉魚從穴中出入大者重千斤色青

皮如鮫魚皮 清異錄鯉魚多是龍化額上有真書王

字者名王字鯉此尤通神 列仙傳子英者舒鄉人也

善入水捕魚得赤鯉愛其色以米穀食之一年長丈餘

遂生角有翼 符子務光自投盧川盧川之伯以赤鯉

送之 陸游入蜀記貴池去城八十里在秀山下江之

一丈別匯為池四隅皆因山石為岸產鯉魚金鱗朱尾
味極美 中華古今注鯉魚之大者鱣魚即今之赤鯉
魚也兗州人謂赤鯉為赤驥謂青鯉為青馬謂黑鯉為
玄駒謂白鯉為白騏謂黃鯉為黃驢 酉陽雜俎唐朝
律取得鯉魚即宜放之仍不得號赤鰓公賣者決六十
鈞磯立談鯉一名穉龍 水族加恩簿鯉本三十六
鱗大烹允尚宜授跨仙君子世美公

謂鯉也

水經注范

丈日南人為奴時牧於澗中得兩鯉魚欲私食之郎知

詰文文詐云將礪石還非魚也郎至魚所果見兩石文
異之石有鐵文因入山中就石治鐵作兩刀舉刀向石
鄭咒曰鯉魚變化治石成刀斫石鄭破者是有靈神文
當治此因斫石鄭如龍淵干將之斬蘆芻遂君其地

冀州圖經太和三年文明太后馮氏幸金河府摩磷宮
湯泉釣得鯉魚一隻皆長三尺以黃金鎖穿腮放於池
內後皆長五尺正光元年五月五日天清氣爽聞池內
鏘鏘聲水中驚沸其一浮天化五色雲而去一在池中

至孝昌元年六月行臺元淵北伐頓此決池取魚鱗甲
非常淵令殺之得金二斤八兩淵明年為葛榮所殺
大業拾遺錄梁郡清泠水南有橫瀆東南至岩山縣西
入通濟渠忽有大魚似鯉而頭一角長尺餘鱗正赤從
清泠水出頭長三尺許入橫瀆逆流西北十餘里不沒
入通濟渠於時夾兩岸隨看者數百人皆謂赤龍大鯉
從淵而出此亦唐祚將興之兆

鮪

月令季春薦鮓于寢廟 周禮漁人春薦王鮓 夏小
正春祭鮓祭不必記而記鮓何也鮓者魚之先至者也
而其至有時 爾雅鮓鮓鮓注鮓鱸屬也大者名王鮓
小者名鮓鮓今宜都郡自京門以上江中通出鱸鱸之
魚有一魚狀似鱸而小建平人呼鮓子即此魚也 詩
義疏鮓魚形似鱸而青黑頭小而尖似鐵兜鍪口亦在
頷下其甲可以摩薑大者不過七八尺益州人謂之鱸
鮓一名鮓肉色白味不如鱸也今東萊遼東人謂之尉

魚或謂之仲明魚仲明者樂浪尉也溺死海中化為此
魚 埤雅鮪魚青黑長鼻體無鱗甲大者長七八尺岫
居至春始出而浮陽 埤雅季冬薦魚春獻鮪則鮪別
於魚其來尚矣故鮪仲春從河西上得過龍門便化為
龍否則點額而還 博物志河陰岫穴出鮪魚焉 東
京賦注王鮪魚名居山穴中其穴在河南小平山長老
言王鮪之魚由南方來出此穴中入河水見日目眩浮
水上流行七八十里釣人見之取以獻天子用祭 宋

祁筆記莒公言河陽出王鮪即今黃魚也形如豕口與目俱在腹下每春二月出於石穴逆河而上人乃取之其腥不可近官以為鮓獻御其味甚美然有毒

魴

詩汝墳魴魚鰭尾注魚勞則尾赤 詩義疏魴魚廣而薄肥恬而少力細鱗魚之美者遼東梁水魴特肥而厚尤美於中國魴故其鄉語曰居就糧梁水魴是也 述異記洛鯉伊魴貴於牛羊 埤雅魴一名魴今之青鰮

也郊居賦曰赤鯉青魴細鱗縮項闊腹魚之美者蓋弱
魚也其廣方其厚褊故一曰魴魚一曰鰕魚魴方也鰕
褊也五雜組魴即鰕也陽晝所謂若食若不食者也
然今之鰕魚最易取常空羣而獲之豈古用釣而今用
罟故有難易襄陽耆舊傳岷山下漢水中出鰕魚肥
美謂之槎頭鰕宋張敬兒為刺史齊高帝求此魚敬兒
作六臚船置魚而獻曰奉槎頭縮項鰕魚一千六百頭
養魚經鰕魚縮項穹脊而細鱗博腹其味腴其色青

白即魴魚也古稱漢水槎頭之鰻吳之太湖亦甚佳矣

水族加恩簿縮項仙人

謂鰻也

鬼腹星鱗道亭襄漢宜

授槎頭刺史

鯽

本草鯽魚小而耐寒 埤雅鯽魚肉厚而美性不食釣

一名鮒魚形亦似鯉色黑而體促腹大而脊隆所在池

澤皆有之孟詵云鯽是稷米所化其腹上猶有米色少

牢饋食曰魚用鮒十有五而俎蓋魚水物也故取數於

月十有五日而盈淮南子曰月虛而魚腦減今此魚旅行吹沫如星然則以相即也謂之鯽以相附也謂之鮒山堂肆考諸魚皆屬火惟鯽魚屬土故能入陽明而有調胃實腸之功能氏謂之逆鱗俗語曰冬鯽夏鰻蓋鯽至冬而肥味甚美也 劉邵七華洞庭之鮒出於江岷紅腴青鰓朱尾碧鱗 神異經東南方海中有祖洲上有烜湖其內鯽魚出焉長八尺食之宜暑而避風寒之氣此魚狀即與江湖小鯽相類耳 酉陽雜俎尋陽

有青林湖鯽魚大者二尺餘小者滿尺食肥美亦可止
寒熱也 韻語陽秋臨安六和寺有金鯽池蘇子美有
詩自子美後四十年東坡始遊此寺嘗投餅餌待乃畧
出不食復入東坡謂此魚難進易退而不妄食宜其壽
四十年如此 法苑珠林梁釋法聰臨靈泉有五色鯽
魚就聽手食聰云是雌龍 水族加恩簿鮮于羹斫膾
清妙見稱杜陵宜投輕薄使銀絲省饜德郎謂鯽也
楊畢膳夫錄膾莫先於鯽魚鰯魴鱸次之鱠齡黃竹

五種為下

廣博物志臨川王宏好食鱖魚頭常日進

三百

鱖即
鯽魚

范蠡種魚經以活鯽魚用竹刀破之入水

銀少許同水滓油菜碎之和拌入魚腹內再以菜裹之
懸空處四十九日用河水取腹內元子一二粒置於水
中以物蓋之頃之一粒即成一魚 孟熙霏雪錄越州
馮裱家竭池取魚一巨鯽前有二足如鼠爪即鼠變
也 太平廣記謝靈運守永嘉遊石門洞入沐鶴溪泊
舟溪旁見二女浣沙顏貌娟秀非塵俗態以詩嘲之曰

浣紗誰氏女香汗濕新雨對人默無言何事甘良苦俄
而二女微吟曰我是潭中鯽暫出溪頭食食罷自還潭
雲蹤何處覓吟罷不見爾雅鰭鰭歸註小魚也似
鮒子而黑俗呼為魚婢江東呼為妾魚玄覽鰭歸三
相從而名妾事物紺珠鰭歸音決似鯽而小黑色而
揚赤爾雅翼又名旁皮鯽名妾魚魚婢以其行以三
為率一前二後如妾婢釣磯立談江海有婢妾魚遊
必三一前二後

鰕

李廷飛延壽書鰕魚刺凡十二應十二月誤噉傷人橄欖核磨水嚙之可解魚畏橄欖故也 爾雅翼鰕魚巨口而細鱗鬚鬣皆圓黃質黑章皮厚而肉緊特異常魚夏月盛熱時好藏石罅中人即而取之其斑文尤鮮明者雄也稍晦昧者雌也漁者以索貫一雄置之谿畔羣雌來齧曳之不捨掣而取之常得十數尾凡魚無肚不嚼鰕魚有肚能嚼 養魚經鰕魚肉味鮮美本草云劉

仙人劉憑常食名桂魚今此魚鄉之人猶有桂之呼
水族加恩簿錦袍氏骨疎肉緊體具文章宜授蘇腸御
史仙盤遊奕謂鰕魚也 潛確類書白龍膾鰕肉也

白魚

論衡武王得白魚噍下文曰以予發 避暑錄太湖之
白魚冠天下梅後十有五日入時白魚最盛謂之時裏
白 一統志白魚出雲南北勝州陳海狀如鯉而色白
中華古今注白魚赤尾曰魴一曰魴或曰魴雄又曰

魴魚子好羣浮水上者曰白萍

青魚

河南通志青魚在濟源形似鯉而背青色又頭中骨煮
拍之可以製器 楊慎外集魚魴即青魚枕骨也可為
燈罩又作女冠 雨航雜錄青鰐魚冬月肥美海錯之
佳者或以此敵松之鱸也 寧波府志地青魚尾有刺
甚長逢物則撥之毒能中人色白者曰地白與魴相類
又名邵陽魚鼠尾魚 事物紺珠鰓青黃色腮下有橫

骨如鋸

鱸殘魚

博物志吳王江行食膾有餘棄於江中流化而為魚今江中有名吳王餘膾魚者長四寸大者如箸猶作膾形高僧傳寶誌對梁帝食膾帝曰朕不知味二十餘年師何必爾誌乃吐出小魚鱗尾依然今金陵膾殘魚是也養魚經膾殘之魚狀如銀魚而大冬月帶子者謂之挨冰嘯

銀魚

養魚經銀魚其形纖細明瑩如銀太湖之人多鱗以鬻
焉長者不過三寸 五雜俎海豐產銀魚然須冬月上
浮時為風吹成冰不能動然後土人琢冰取之春風至
則逸矣 鳥獸考銀魚大者如指春生梅溪中杜子美
所謂天然二寸魚者是也 山堂肆考銀魚身圓如筋
潔白無鱗目兩點黑寧波志形如麪條而純白色 杜
詩註詩云天然二寸魚又名之曰白小當是今所謂麪

條魚者 正字通銀魚形如鱸殘海中出者曰龍頭魚
福州一種曰水晶魚 事物紺珠龍頭魚頭類龍身似
鰕小而肉嫩

鰕

埤雅鰕魚形狹而長若條然故曰鰕也今江淮之間謂
鰕魚性浮似鰕而白 正字通條小白魚也俗稱鰕魚
亦曰參條魚小而長時浮水面性好游故名 莊子觀
于濠梁條魚出游從容以為樂 淮南子不得其道若

觀鯨魚望之可見即之不可得 荀子鯨鮪者浮陽之魚也肱於沙而思水則無逮矣註謂此魚好浮於水上就陽也

鰭

埤雅鰭今黃鰭魚是也性浮而善飛躍故一名揚又名黃揚舊說魚膽春夏近下秋冬近上 詩疏鰭魚似燕頭魚身形厚而長骨正黃魚之大而有力解飛者今江東呼黃鰭魚一名黃鰭魚尾微黃大者長尺七八寸許

錄異記鰮魚狀如鱧其文赤斑長者尺餘豫章界有
之多居污泥池中或至數百能為魍魎子故反鬼幻惑妖怪
亦能魅人

鰮

養魚經鰮魚口闊而盆首似鯉而身圓謂之草魚食草
而易長 爾雅注鰮魚即今鰮似鱖而大 本草鰮生
江湖間膽至苦主喉閉 談苑鰮魚惟食草人刈草以
飼之至八月則不食至三月復食如初 嶺表錄異新

瀧等州山田揀荒平處以鋤鉞開為町疇伺春雨丘中貯水即先買鯢魚子散於田內一二年後魚兒長大食草根根竝盡既為熟田又收魚利及種稻且無稗草乃齊民之上術也

鰻

彙苑詳註鰻似鮪而小 埤雅鰻今鰻額白魚也一名鮎身圓性偃 養魚經鮎魚者鰻魚也即鰻魚也大首方口背青黑而無鱗多涎 搜神記孔子厄於陳夜有

一人長九尺餘，阜衣高冠，咤聲動左右。子路引出與戰於庭，俯之於地，乃是大鯢魚也。彙苑詳註：鯢魚赤目，赤鬣者，食之能殺人。永嘉郡記：樂城縣三原亭去郡百二十里，溪水清如鏡，曩昔有得一死鮎者，鬣大五六圍，一鬣輒得數十斛鮎。周益公記：宜興洞有四足鮎，宋乾道六年行都北關有鮎魚，色黑，腹下出人手於兩旁，各具五指，此魚妖也。彙苑詳註：鱖魚似鮎而大，色白。黎暹鼠鮎說：海有魚曰鼠鮎，善食鼠，每揭尾沙際。

以紿鼠鼠見之以為彼且失水矣舐其尾將食之鮎倏轉首厲齒撮鼠入水以去狼藉其肉羣蝦皆食之

鱒

陸璣詩疏鱒似鯢魚而鱗細於鯢也赤眼多細文 孫
炎正義鱒好獨行制字从尊殆以此也 徽州府志鱒
多獨或二三相從見網則遁 爾雅翼鱒魚食螺蚌

鯢

詩疏鯢似魴厚而頭大魚之不美者故里語曰網魚得

鯀不如罔姑其頭尤大而肥者徐州人謂之鯀或謂之
鰭幽州人謂之鵝鵝或謂之胡鰭 埤雅鰭魚似鰭而
弱鱗其色白北土皆呼白鰭西征賦曰華鰭躍鱗素鰭
揚暑性亦旅行故其制字从與亦或謂之鯀也傳曰連
行魚屬若此之類是已失水即死弱魚也 山堂肆考
青鯀曰鰭白鯀曰鰭

鰭

本草鰭是公鰭蛇所化至難死雖斬頭身尚能動猶有

蛇性故或謂之鰐此魚胎生與諸魚卵生者不同一產
不下五百子皆隨母而行即啖食之十不留五 本草
鱧魚一名鮓味甘無毒 爾雅鰐大鮓小者鮓 埤雅
鱧今玄鱧是也諸魚中唯此魚膽甘可食有舌鱗細有
花文一名文魚與蛇通氣其首戴星夜則北嚮 爾雅
翼鱧魚圓長斑點有七夜則仰首向北斗而拱有自然
之鱧故从禮道家忌食之以其首戴斗也 六書故鱧
魚之摯者鱗黑駁首左右各有竅如七星雌雄相隨將

子啖食衆魚 養魚經黑魚者鱧魚也 本草注道家以鱧魚為水厭

土附

養魚經土附魚似黑鯉而短小附土而行不似他魚浮水故名 京口錄首大而身小謂之吐鰕 雨航雜錄吐哺魚名土附以其附土而行也或曰食物嚼而吐之故名 山堂肆考杜父魚一名吐哺魚似吹沙而大黑皮細鱗如粟無鬣俗呼主簿魚蓋杜父訛為主簿也

演繁露吳興人名上附魚為鱸鯉以其質圓而長與黑
蟲相似而其鱗斑駁又似鱸魚故兩喻而兼言之也

鰻

埤雅鰻無鱗甲白腹似鱈而大青色焚其烟氣辟蠹有
雄無雌以影漫於鱧魚而生子皆附鱧之鬣鬣而生故
謂之鰻鰻也一曰鮎亦產鰻蓋其乳子三分之二為鮎
其一鰻也 本草鰻鰻能殺蟲焚其骨辟蚊 彙苑詳

註鰻鰻味甘形似鮎能緣樹食藤花 通雅桂林有石

鰻出洞穴性涼廣州海鰻最大者曰狗魚涎能殺蠱
一統志靈濟泉在奉化縣治西南其泉出石竇間深不
盈尺相傳中有九節鰻魚禱雨獲之即應 稽神錄瓜
村有漁人妻得勞疾轉相染著死者數人即取病者生
釘棺中棄之中流有漁人引至岸開視猶活因取置漁
舍每多得鰻鯪魚以食之久之病愈 夷堅續志鰻背
有白點無鰓者不可食四目者殺人

鰻

山堂肆考鱔魚似鰮而長無鱗有涎黃色俗呼黃鱔生
溝瀆淺水中好穿穴田塍因以泄水為農夫患又鱔頭
昂起寸許者名昂頭鱔不可食鱔一作鰮一作鰮梁韋
琳以鰮為粽熬將軍又曰油熬校尉又曰臙州刺史

淮南子鰮似蛇

物類相感志鰮魚陶弘景云芹根變

作又曰人髮所化作臙食之甚補益 清異錄京洛白

鱔極佳烹治四方罕有得法者周朝寺人楊承祿造脫
骨獨為魁冠禁中時亦宣索承祿進之文其名曰軟釘

雪籠水族加恩簿單長福

謂鰾也

曲直靡常鮮載具美

宜投泥蟠掾

鰾

埤雅鰾今泥鰾也似鰾而短無鱗以涎自染難握與魚
為牝牡莊子所謂鰾與魚遊一名鰾孫炎爾雅正義曰
鰾尋也尋習其泥厭其清水舊說守魚以鼈養魚以鰾
益鰾性首健善擾令魚利轉物類相感志燈心煮鰾
味佳曲洧舊聞劉達公達奉使三韓道過餘杭時將

穎為太守取金色鰵一條與龜獻於達以致今秋歸之
意

格致鏡原卷九十一

欽定四庫全書

格致鏡原卷九十二

大學士陳元龍撰

水族類 三

石首

初學記石首魚初出水能鳴夜視有光服其石能下石
淋魚鱗色甚黃如金和蓴菜作羹謂之金羹玉飯薨而
食之名為鰲炙食之主消瓜成水 吳地記闔廬十年
東夷侵吳王入海逐之據沙洲上相守月餘屬時風濤

糧不得渡王焚香禱之言訖東風大震水上見金色逼
海而來遶吳王沙洲百匝所司撈漉得魚食之美三軍
踊躍夷人一魚不獲遂送降款吳王將魚腹腸肚以醢
水淹之送與夷人因號逐夷吳王歸思海中所食魚問
所餘所司云竝曝乾王索之其味美因書美下著魚是
為鰲字今從鰲非也魚出海中作金色不知其名吳王
見腦中有骨如白石號為石首魚 物產志石首魚似
鮓而小尾鬣皆黃色一名黃魚 張勃吳錄婁縣有石

首魚至秋化為冠冕 山堂肆考石首魚能鳴網師以
長竹筒抽水以聽之聞其鳴則下網每獲至千餘以鹽
醃之曝乾名曰白鰲浙人呼為鰲魚 華夷鳥獸考魚
首有魷堅如石故名冬月得之又緊皮者良三月八月
出者次之至四月五月海郡民發巨艘入洋山競取有
潮汎往來謂之洋山魚 爾雅翼石首魚一名鰲 五
雜組韋昭春秋外傳注石首成鰲鰲鴨也今海濱石首
至今未聞有化鴨者 博物志鰲鰼即石首魚常以三

月八月出 爾雅翼諸魚乾者皆為鮓美不及石首故
獨得白之名呼白鮓若露風色變紅則失味 養魚經
石首魚閩謂之金鱗又謂之黃瓜 事物原始石首魚
腹中之膘可以作膠呂向謂魚當無聲言有聲者悞不
知海中捕石首魚者以竹筒聽之其聲如雷魚來候也
上林賦云魚鱉謹聲可証 倦游雜錄黃魚為鸚鵡
雨航雜錄鰻魚即石首魚也小者曰鰈魚又名躡魚最
小者名梅首又名梅童其次名春來土人以槐荳花卜

其多寡槐荳花繁則魚盛腦中有白石如碁子取其石
次以為器或飲食遇毒則暴裂腦漏者用其石燒灰吹
入鼻中即愈又下石淋炙食之主消瓜成水諸魚有血
石首獨無血僧人謂之菩薩魚至有齋食而啖者 臨
海異物志又有石頭長七八寸與石首同 嶺表錄異
石頭魚狀如鰮魚隨其大小腦中有二石子如蕎麥瑩
白如玉有好奇者多市魚之小者貯於竹器任其壞爛
即淘之取其魚腦石子以植酒籌頗脫俗 異物志石

首小者名躡水即梅魚也似石首而小黃金色味頗佳
頭大於身人呼為梅大頭出四明梅山洋故名梅魚或
云梅熟魚來故名 正字通梅似鰓而小一名黃花魚
福溫多有之溫海志名黃靈魚即小首魚首亦有石
鬐史物性志鰓形似石首魚左右三牙如鐵鋸或曰石
首雄鰓雌也

鰓

雨航雜錄鰓魚首夏以時至而名 寧波府志箭魚即

江湖鱖魚海出者最大甘肥異常腹下細骨如箭鏃俗名箭魚 山堂肆考鱖魚味美在皮鱖之交故食不去鱖而出富陽者尤美此東坡有鱖魚多骨之恨也 養魚經鱖魚盛於四月鱖白如銀其味甘美多骨而速腐廣州謂之三鰲之魚閩志曰大者長數尺春末有之

楊慎外集時魚似魴厥味肥嫩品高江東價百鱸鮓界江而西謂之瘟魚棄而不餌 袁達禽蟲述鱖胃網不動護其鱖也鱖用石灰水浸之暴乾可作女人花鈿

本草鮓魚補虛勞稍發疳瘕

鯊

六書故鯊魚海中所產以其皮如沙得名哆口無鱗胎生其類尤多大者伐之盈舟海語鯊有二種魚麗之鯊蓋閩廣江漢之常產海鯊虎頭鯊體黑紋鱗足巨者餘二百觔常以春晦陟於海山之麓旬日而化為虎惟四足難化經月乃成矣或曰虎紋直而疎且長者鯊化也炳炳成章者常虎也山堂肆考鯊魚中有犂頭鯊

頭似犁鑿而長尖銳刺人有香鯊體有香氣有熨斗鯊
頭如熨斗有了髻鯊頭如了髻有劍鯊長嘴如劍對排
牙棘人不敢近又有名狗鯊者狗頭魚身聲如狗吠形
類彈塗而大大者長丈餘好伏泥塗中而吠見人則驚
入水 寧波府志鯊魚有白蒲鯊黃頭鯊白眼鯊白蕩
鯊青頓鯊斑鯊牛皮鯊鹿文鯊鰓鯊鱖鯊燕尾鯊刺鯊
鋸鯊鹿鯊其類甚多 爾雅翼大而長喙如鋸者曰胡
鯊性善肉美小而皮粗者曰白鯊肉強有小毒 潛確

類書蚊鯊似蚊而鼻長皮可飾劍湖鯊青色背上有沙
鬚鬣泡去外皮有絲作膾瑩若銀絲 五雜俎鯊魚重
數百斤其大專車鋸牙鉤齒其力如虎漁者投餌即中
徐而牽之怒則復縱如此數次俟至岸側以困共拽出
水即以利刃斷首少遲恐有掀騰之患故市肆者未嘗
見其首余在真州藥肆中見之猛獍猶怖人也蓋鯊魚
乃鱷類耳 本草李時珍曰鰈與鯊一類而數種大者
尾長數尺能傷人皮皆有沙如珍珠斑其背有珠文如

鹿而堅強者曰鹿鯊亦曰白鯊云能變鹿背有斑文如
虎而堅強者曰虎鯊亦曰胡鯊云虎魚所化鼻前有骨
如斧能擊物壞舟曰鋸鯊又曰挺頷魚曰鰭鰭謂鼻骨
如鰭斧也 通雅鮫海鯊魚之最大者也 交州記鮫
魚出合浦長三尺背上有甲珠文堅強可以飾刀口又
可以鑢物 交州異物志鮫之為魚其子既育驚必歸
母還入其腹小則如之大則不復 爾雅翼鮫出南海
形似鯢無脚有尾今謂鯢魚南人皆鹽為脯一名鰭

正字通左思吳都賦有鮫又有鰐鰐釋者以背上有珠
文為鮫橫骨在鼻前如斤者為鰐鰐蓋鮫白鯊也鰐鰐
胡鯊也 異物志鰐鰐魚所擊無不中斷 臨海水土
記鰐魚鹿文青目 臨海異物志虎鰐長五丈黃黑斑
耳目齒牙有似虎形唯無毛或曰變乃成虎又有蝦鰐
尾似蝦 兩航雜錄鰐魚長二丈大數圍小者圓廣尺
餘背粗錯有文一名鮫魚 一統志鰐魚大盈丈腹有
洞貯水以養其子 酉陽雜俎章安縣出鰐魚頰赤如

金腹下正白魚子生後朝出索食暮入母腹出從口入
從臍腹中容四子甚健網不能制俗呼為河伯健兒

鰾鯢

養魚經江海之產有鰾鯢之魚其長丈餘鼻端有肉骨
四分身之一兩頰之肉謂之鹿頭可以為鮓京口錄云
是兩種鰾肉之色白鯢肉之色黃廣州謂之鰾龍之魚
云類龍而無角 山堂肆考鰾一作鰾似鱣而大江
湖皆有之鼻長如鸛嘴故名鸛嘴魚無鱗有青黑斑

文作鮓甚美口在頷下一名鱖鯉魚 酉陽雜俎東海
漁人言近獲魚長五六尺腸胃成胡鹿刀槩之狀號泰
皇魚 水族加恩簿食寵侯謂鮓也宜授添厨大監

鱸

說文鱸魚巨口細鱗 寧波志鱸魚身有黑點作鮓最
良 續韻府天下之鱸皆兩腮惟松江鱸四腮 談苑
松江鱸魚長橋南所出者四腮天生膾材也味美肉緊
切不終日色不變橋北近崑山大江入海所出者三腮

味帶鹹肉稍慢迴不及松江所出 大業拾遺錄六年
吳郡獻松江鱸魚乾膾鱸魚肉白如雪不腥所謂金齏
玉膾東南之嘉味也 六書故海鱸大者四五尺其肉
毳者尤美 金谷園記鱸魚秋仲由海而入江可以作
膾 京口錄鱸有二種曰脆鱸曰爛鱸 華夷鳥獸考
海中四腮鱸皮緊脆而肉厚呼曰脆鱸有江鱸差小而
兩腮味淡有塘鱸雖巨而不脆 河圖挺佐輔黃帝至
於萃瀉之川有大鱸魚折溜而至五色畢具魚汎白圖

蘭葉朱文以授黃帝名曰錄圖 謝玄與兄書北固山下大有鱸魚一出手釣得四十九枚 水族加恩簿盧清臣

謂鱸也

宜授橙蠶錄事守招賢使者

鰮魚

異物志鰮魚形如魷長七尺吳會稽臨海皆有之 六書故鰮今鰮淡水者長不踰尺搏身椎首而肥俗謂之鰮海亦有之 雨航雜錄鰮魚似鯉生淺海中專食泥身圓口小骨軟肉細介象與吳王共論魚以鰮魚為

上取其益陰 養魚經鰯魚松之人於潮泥地鑿池仲春
潮水中捕盈寸者養之秋而盈尺腹背皆腴為池魚之
最是食泥與百藥無忌京口錄云頭扁而骨軟閩志云
目赤而身圓口小而鱗黑其魚至冬能牽類而自藏
物產志鰯魚性慧不入網吾海人以長網圍之俟潮退
取之肉厚味絕美凡海中魚多以大噬小惟鰯魚不食
其類鰯一作鱣一作鰩

鰯魚

王得臣塵史鮒魚閩中鮮食最珍者長七八寸闊二三寸剖之子滿腹冬月正其佳時莆田迎仙鎮乃其出處驛左有祠謂之通應侯祠有水曰通溪潮汐上下土人以鹹淡水不相入處魚最美 捫蝨新話泉州有通應侯廟其下臨海出子魚甚美世呼通應子魚者記所出也荆公詩遂誤用謂長魚俎上通三印東坡又以通印子魚對披綿黃雀此皆是傳聞之誤 遜齋閒覽莆陽通應子魚名著天下今人必求其大者可容印謂之通

印子魚此傳聞之訛者

鯿

爾雅鯿鯿刀註今之鯿魚也亦呼為鯿魚 說文鯿魚
飲而不食 養魚經鯿魚狹薄而首大長者盈尺其形
如刀俗呼刀鯿初春而出於湖 寧波府志鯿魚子多
而肥夏初曝乾可以致遠郭璞江賦曰鯿鯿順時而往
還常以三月八月出故曰順時 雨航雜錄鯿魚即刀
魚一名鯿腹背似刀又名鯿魚文字集畧鯿亦作鯿又

音制 三輔決錄鰻魚肥炙甚美諺云寧去累世宅不
棄鰻魚額 彙苑詳註鰻魚枝身多鯁長不五六寸味
極肥腴以糟浥之可作湯 山堂肆考鰻一作鱖本草
鱖魚有鱗長尾扁身 戒菴漫筆子鱖又有一種小而
無子者名省鱖不佳 水族加恩簿惟爾白圭夫子
謂鱖也 貌則清臞材極美俊宜投骨鯁卿 本草鱖魚一名
鰻魚一名鰻魚一名望魚一名鱮魚 魏武四時食制
望魚側如刀可以割草出豫章 異物志鱮魚仲夏始

從海中汴流而上腹下如刀長尺餘項上細骨如毛在肉中又有禽腎在腹中初立夏有白鳥似鷺羣飛謂之鰮魚鳥至仲夏鳥藏而魚出變化所生

鰮

養魚經鰮魚腹下之骨如鋸可勒故名出與石首同時海人以冰養之而鬻於諸郡謂之冰鮮 潛確類書肋魚似鰮魚而小身薄骨細冬月出者名雪映魚味佳至夏則味減矣率以夏至前後為期

鱣

詩義疏鱣出江海三月中從河上身形似龍銳頭口在
頷下背上腹下皆有甲縱廣四五尺今於盟津東石磧
上鉤取之大者千餘觔可蒸為臠又可為鮓魚子可為
醬 魏武食制鱣大如五斗匱長一丈 彙苑詳註鱣
鱣屬也長數丈而骨可啖似黃鮓而長 埤雅鱣肉黃
似鰓口在頷下無鱗長鼻顛骨俗謂之玉板大者長二
三大江東呼黃魚 庶物異名疏玉板黃魚言肉色也

雜俎蜀中每熬黃魚天必陰雨 爾雅翼大者曰王

鱸

鰯

寧波府志鰯鰯一名鰯魚身扁而銳狀若鋸刀身有兩
斜角尾如燕尾細鱗如粟骨軟肉白其味甘美春晚最
肥俗又呼為鰯魚以其與諸魚羣故名 山堂肆考鰯
魚一名昌侯魚縮項匾身似鰻而短鱗細色白生海中
楊慎外集鰯魚只有一脊骨治之以薑葱煮之以粳

米其骨亦軟食之無餘俗號狗磕睡魚 事物紺珠鱈
魚兩肋下有肥肉如炙臠形似鰯而腦上突起連背而
圓肉甚厚白如凝脂

魮

酉陽雜俎黃魮

烘音

魚色黃無鱗頭尖身似大槲葉口在

頷下眼後有耳竅通於腦尾長一尺末三刺甚毒 六

書故魮海魚無鱗狀如蝙蝠大者如車輪 興化府志

魮魚頭圓禿如燕其身圓扁如簸箕尾圓長如牛尾其

尾極毒能螫人有中之者連日夜號呼不止以其首似燕故又名燕魮魚以其尾言故又名牛尾魚福州人食味重此 雨航雜錄魮魚形圓似扇無鱗色紫黑口在腹下尾長於身如狸鼠其最大者鮫其次曰錦魮曰黃魮曰斑魮曰牛魮曰虎魮魮字或作魮文選所謂魮魚也大抵諸魚性熱而海魚尤熱不可常餐 事物原始魮魚尾稍有一骨長二三寸人若被其一刺者急煮魚鳧竹及海獺皮解之可救二刺者困甚中三刺者死其

脂熬油可燃燈 山堂肆考魮魚亦胎生其子出入母腹形如覆笠有肉刺能刺人

章魚

稗談海上鱗族異者名章拒大者名石拒居石穴人取之能以脚黏石拒人故名 埤史章舉一名章魚一名章拒一名章鋸以其足似鋸也形類烏賊而小 閩部疏莆人於海味最重鱧魚形雖不雅而味美於烏賊 寧波府志章舉形如大算袋八足長二三尺足上戢戢

如釘每釘有竅 陽江縣志章魚足數寸獨二足長尺
許而各密綴肉如臼臼吸物絕有力就淺水佯死鳥信
而啄之則舉其足以取螃蟹尤苦其毒遇海濤急以長
足臼碇石自固今之船碇效焉 水族加恩簿章丘大
都督忠美侯滄浪頭 謂章拒也 隱浪色奇入甌稱最可靈淵
國上相 嶺表錄異章舉之類有小者兩足如帶曝乾
後似射踏子故南中呼為射踏子也

烏鰂

埤雅烏鰂八足絕短者集足在口縮喙在腹懷板含墨
志曰烏鰂懷墨而知禮舊說烏鰂有石遇風則蚪前一
鬚下石一名纜魚風波稍急即以其鬚為纜蓋此魚每
遇大風遠岸則蚪前一鬚為石近岸則黏前一鬚為纜
炙轂子此魚每遇漁舟即吐墨染水令黑以混其身
漁人見水黑則知是網之大獲 埤雅烏鰂肉白皮黑
無鱗有鬚蜀本草木圖經云鷓即此是也義訓云寒烏
入水謂之烏鰂 南越記烏賊魚常自浮水上烏見以

為死便啄之乃卷取烏故謂烏賊魚 酉陽雜俎烏賊
舊說名河伯從事遇大魚輒放墨方數尺以混身江東
人或取其墨書契以脫人財物書迹如淡墨逾年字消
唯空紙耳海人言昔秦王東遊棄算袋於海化為此魚
形如算袋兩帶極長 本草經烏賊魚骨治寒熱驚風
臨海異物志烏賊之骨其大如楯居者一枚作鮓滿
器受五升 庶物異名疏鎖管似烏賊而小色紫 興
化府志鎖管大如指其身圓直如鎖管其首有薄骨插

入管中如鎖鬚亦有墨有黃或結子如白飯煮熟其白如玉笋其味甘脆或醃食之宜薦酒或謂之淨瓶魚

鮑

嶺表錄異水母廣州謂之水母閩謂之鮑癡駕反其形乃

渾然凝結一物有淡紫色者有白色者大如覆帽小者

如盃腸下有物如懸絮俗謂之足而無口眼常有數十

蝦寄腹下啞食其涎浮泛水上捕者或遇之即歛然而

沒乃是蝦有所見耳

越絕書云海鏡蟹為腹水母蝦為目

南中好食之云

性煖治河魚之疾然甚腥須以草木灰點生油再三洗
之瑩淨如水精紫玉肉厚可二寸薄處亦寸餘先煮椒
桂或荳蔻生薑纓切而燂之或以五辣肉醋或以蝦醋
如鱠食之最宜蝦醋亦物類相攝耳水母本陰海凝結
之物食而煖補其理未詳博物志東海有物狀如凝
血縱廣數尺正方圓名曰鮓魚無頭目無腹臟所處則
衆蝦附之隨其東西南北越人煮食之北戶錄水母
一名鮓一名石鏡廣韻水母名蜺形如羊胃無目又

名海鰲 農田餘話今之水母俗稱海鰲或作洩聲

雨航雜錄鮑魚俗所謂海蜃也雨水多則是物盛其形如覆笠土人食之皆以為去積其實損脾 庶物異名疏水母俗名海舌濛濛如沫有知識無耳目 本草一名樗捕魚生東海如血蛸大者如牀小者如斗 山堂肆考按水母生海中四月初生如帶至六月漸大如盤形似白綿絮而無耳目口鼻鱗骨一段赤色破碎者謂之頭其肉如水晶以明礬醃之吳人呼為水母鮮久

則漸薄如紙俗呼為白皮紙 水族加恩簿借眼公水謂
母受體不全兩相藉賴宜授同體合用功臣左右衛駕
海將軍

比目魚

爾雅東方有比目魚焉不比不行其名謂之鰈註狀如
牛脾鱗細紫黑色一眼兩片相合乃得行今水中所在
有之江東又呼為王餘魚 臨海異物志比目魚似左
右分魚南越謂之板魚亦謂之箬葉魚 嶺表錄異南

人謂之鞋屨魚淮江謂之拖沙魚 正字通臨海志云
婢展魚風土記云奴儻魚皆鰈之別名 北戶錄比目
魚一名鰈亦曰生介介亦作鮓唐韻鮓比目魚也 雨
航雜錄比目魚二魚相合乃行單則為王餘又竹夾魚
似比目而肉堅身圓尾尖青黑一名土鰈 尚書中候
帝王將興比目魚出鄭註比目魚曰東繇

吹沙魚

詩疏魴吹沙也似鯽魚狹而小體圓而有點一名重脣

常張口吹沙 異物志吹沙長三寸許背上有刺螫人
埤雅釋魚云魮鮓今吹沙小魚性善沈大如指狹圓
而長常沙中行亦於沙中孔子 雨航雜錄魮鮓春正
月輒至魚最先至者 留青日札吹沙魚爾雅名魮鮓
海濱人呼曰新婦臂以為珍品

河豚 附江豚

養魚經河豚出於江海有大毒能殺人無類無鱗與口
目能開闔能作聲是鱗中之毒品也凡烹調者腹之予

目之睛脊之血必盡棄之洎二皮肉肝之有斑眼之赤
肝之獨包鉗之一異俱不可食凡洗宜極淨煮宜極熟
治之不中度不熟則毒於人 談苑河豚瞑目切齒其

狀可惡不中度多死棄其腸與子飛鳥不食誤食必死
登州瀕海人取其白肉為脯先以海水淨洗換海水浸
之暴於日中以重物壓其上須候四日乃去所壓之物
傳之以鹽再暴乃成如不及四日則肉猶活也太守李
大夫嘗以三日去所壓之物俄頃肉自盆中躍出乃知

淪之不熟真能殺人也 雨航雜錄河豚腹無膽頭無
腮其肝最毒獨眼者尤甚海上人得之去其頭尾用楸
欖甘蔗煮之然初出時可食至後則其毒尤甚諺曰蘆
青長一尺不與河豚作主客予鄉亦盛食之春時延客
不得此為不敬然往往有食而死者或曰煮熟則無患
多食亦發瘍厚生者所當戒 彙苑河豚與荊芥等風
藥相反服風藥而食之者即死 楓牕小牘東坡謂食
河鮠值得一死余過平江姻家張諫院言南來無他快

事祇學得手煮河魷耳須臾烹煮對余方且共食忽有客見顧俱起延欸為猫翻盆犬復佐食頃之猫犬皆死幸矣哉奪兩人於猫犬之口也乃汴中食店以假河魷餉人以今念之亦足半死六一詩話梅聖俞嘗於范希文席上賦河豚魚詩云春洲生荻芽春岸飛楊花河豚當是時貴不數魚蝦河豚常出於春暮羣遊水上食絮而肥南人多與荻芽為羹云最美故知詩者謂祇破題兩句已道盡河豚好處風月堂詩話晁季一檢詩

常為予言歸田錄所記聖俞賦河豚云云則是食河豚時正在二月而吾妻家毘陵人爭新相問遺會賓客惟恐後時價雖高無吝色多在臘月過上元則不復貴重所食時節與歐公稱賞聖俞絕不相同豈聖俞賦詩之地與毘陵異邪風氣所產隨地有早晚亦未可一槩論也 石林詩話歐陽公稱梅聖俞河豚詩謂河豚出於暮春食柳絮而肥殆不然今浙人食河豚始於上元前常州江陰最先得方出時一尾至直千錢然不多得非

富人大家預以金啖漁人未易致二月後日益多一尾
纔百錢耳柳絮時人已不食謂之斑子或言其腹中生
蟲故惡之而江西人始得食蓋河豚出於海初與潮俱
上至春深其類稍流入於江公吉州人故所知者江西
事也 蟬史吳人珍河豚品其腹腴為西施乳 物理
小識河豚愛五色縷人因以取之 張耒明道雜志河
豚魚水族之奇味也而世傳以為有毒能殺人中毒則
覺脹亟取不潔食乃可解不爾必死余時守丹陽及宣

城見土人戶食之其烹煮亦無法但用萋蒿荻笋松菜
三物云最相宜用松以滲其膏耳而未嘗見死者或云
土人習之故不傷是大不然蘇子瞻是蜀人守揚州晁
無咎濟州人作倅河豚出時每日食之二人了無所覺
但愛其珍美而已南人言魚無鰓無鱗與目能開闔及
作聲者有毒而河豚備此五者故人畏之而此魚自有
二種色淡黑有文點謂之斑子云能毒人而土人亦不
甚以捕也蘇子瞻在資善堂與數人談河豚之美諸人

極口譬喻稱贊子瞻但云噫其味真是消得一死人服
以為精要余在真州會上食假河豚是用江鮠作之味
極珍有一官伎謂余曰河豚肉味頗類鮠而過之又鮠
無脂腴也脂腴河豚腹中白腴也土人謂之西施乳晁
無咎謂味似鰻鱺而肉差緊多食不令人逆此魚出時
必成羣一網取數十初出時雖其鄉亦甚貴在仲春間
吳人此時會客無此魚則非盛會其美尤宜再溫吳人
多晨烹之羹成候客至率再溫以進或云其子不可食

其子如一大粟而浸之經宿大如彈丸也或云中其毒者亦不必食不潔水調炒槐花末及龍腦水皆可解余見人有說中此毒急服至寶丹亦解橄欖最解魚毒其羹中多用之而吳人悉不論此直云用不潔解河豚是戲語耳惡烏頭附子之屬丁隲吳人因食河豚而死或云丁自中風非因食魚 五雜組河豚最毒能殺人閩廣所產甚小然猫犬烏鳶之屬食之無不立死者而三吳之人以珍品其脂名西施乳乃其肝尤美所忌血與

子耳其子亦有食者少以鹽漬之用臘脂染不紅者即有毒紅者無毒可食一云烹時用傘遮蓋塵墜其中則殺人中毒者橄欖汁及蔗漿解之然十百無一二也

酉陽雜俎鰓魚肝與子俱毒父能已其毒

鰓即河豚

陶九

成輟耕錄中河豚毒者槐花微炒與乾臘脂等分同擣粉水調灌之良

毛勝水族加恩簿黃薦可

謂河豚也爾澤

嫩可貴然失於經治敗傷厥毒故世以醇疵隱士為爾之目特授三德尉兼春榮小供奉 山海經少咸山敦

水東流注於雁門之水中多鮪鮪之魚食之殺人註音

貝

本草綱目鮪鮪即河豚 演繁露類篇魚部引博

雅云鮪鮪

盈之反

鮪也背青腹白觸物即怒其肝殺人正

今人名為河豚者也然則豚當為鮪 異物志鮪鮪魚

狀如科斗大者尺餘腹下白背上青黑有黃文性有毒

雖小獺及大魚不敢飲之蒸煮飲之肥美豫章人珍之

名義考鮪鮪河豚也 寧波府志鮪或作鮪一名河

豚觸物輒嗔腹脹如鞠浮於水上一名嗔魚 爾雅翼

鯢今之河豚每三頭相從號為一部諺云得一部典一
袴冬至日輒至應中字十一月卦信及豚魚河豚也

通雅鯢鯢鯢鮎鮎皆今之河豚亦曰烏狼一曰探魚黃
者曰黃鯢 本草一名吹肚魚又名氣包魚 物類志

胡夷魚即河豚 臨海記鯢鰭即河豚之大者 戒菴

漫筆河豚大者名青郎君小者名斑兒 食物本草魴

魚形似河魴而小背青有斑文無鱗尾不岐腹白有刺
亦善噉噉之則腹脹大圓緊如鞠仰浮水面 養魚經

斑魚似河豚而小食者雖無恙然亦是其種類并絕之

可也

魚即鮠

鳥獸考又一等名曰白河豚又名鮠魚其

狀相類無毒 楊慎外集鮠魚一名水底羊

江豚 說文江豚一名鱠鮠逢風則涌一名鮠魚一名

奔鮠 史記正義江豚名鱣鮠 魏武帝四時食制鮠

鮠之魚出淮及五湖黃肥不可食大如百觔豬數枚相

隨沈浮自如 酉陽雜俎奔鮠一名濁非魚非蛟大如

船長二三丈若鮠有兩乳在腹下雌雄陰陽類人取其


子著岸上聲如嬰兒啼項上有孔通頭氣出嚇嚇作聲
必大風行者以為候相傳嬾婦所化殺一頭得膏三四
斛取之燒燈照讀書紡織輒暗照懼樂之處則明山
堂肆考江豚俗呼拜江豬狀似狔鼻中有聲腦上有孔
噴水直上出入波浪中無鱗色黑本草江豚大如豬
數枚同行一浮一沒謂之拜風郭璞賦海稀江豚是也
其子如蠶魚子隨母行人取其子繫水中其母自來就
而取之水族加恩簿屯江小尉

謂江豚也

授追風使

鯨

事物原始鯨魚色蒼而鱗細有膠無膽 雨航雜錄鯨
樂清志所謂鯨魚是也一曰茅狂 寧波府志鯨魚狀
似鱸而肉麤三腮曰鯨四腮曰茅鯨小者曰鯨姑 田
九成遊覽志鯨魚每歲四月自海洋綿亘數里聲如雷
海人下網截流取之



格致鏡原卷九十二